

蕭山縣志稿

十六

蕭山縣志稿卷三十二

藝文

詩文鈔一

此卷擇錄乾隆志凡流連光景無關典要之作不錄非本貫人詩文姑著其籍以爲識別無考者曰籍待考是否邑人無從證實者曰未詳

樂府

元

吳越兩山亭

薩都刺

蒙古

幹山孤亭據磐石老我凭高興無極長松參天凝黛色空翠滿山如雨滴長江中斷海門闢兩岸連峯排劍戟或蟠臥龍形或鼓丹鳳翼仙乘縹緲東海東徐福樓船竟何益採藥人已陳鞭石土有赤四海混一車書同形勝何須限南北吁嗟霸業今誰在吳山越山長不改

明

築隄謠

魏驥

天吳苦作孽壞此長江隄沃壤變斥鹵平地成深池况值天雨雪政及農興時凶年轉豐歲須在人維持顧此長隄壞不葺害無涯鄉老訴縣官縣官惟戲噓至委十大戶大戶不敢違大戶雖竭力十家豈能支椿石且不備夫匠尤甚虧葺寸反壞尺可奈心不齊欲求官監督監督刑必施刑施先姦頑姦頑生怨咨於是果何若只願天垂慈山水勿澎湃江潮勿奔馳移沙與換港扶桑吐晴曦天吳速悔禍庶免民流離

何孝子

來集之

兒之臂父之身先天一氣分兩人兒臂傷父身活人力遂將造化奪何家一兒孺慕深焚香露禱感天心芳名在史痕在臂舉世人兒皆媿死君不見孝子之子英且豪于公門閭日以高

七條沙

有序

前人

浙江近西陵一岸有七條沙江水浙下爲長江扼要之所唐人云千里長江惟渡馬百年養土得何人蓋句踐烏鳶之歌傷魂動魄其聲可譜也

江之水何悠悠，頽唐漭漭春復秋。子胥一怒竟千古，素車白馬當潮頭。西有吳，東有越，兩岸青山界如截。自昔迤邐不盡時，浩浩東流幾曾絕。鳶鳥江山聽悲歌，六千君子提琬戈。種蠡奇謀今已矣，西風捲雨鳴哀鼉。潮來江水渾，潮去江水清。天吳吹浪逐今古，神巫爭地同陂平。十萬雄兵如解瓦，瞥見波心驟飛馬。江山不識興廢間，潮落潮生總無假。獨不見赤壁淮淝采石磯，芳名佳履四蓋垂。

端居

來蕃

麻溪有流澌，東行亦蒼茫。來經蘿山下，老樟覆陂塘。豈無濛洪人性道，存天良。農者已長大，魁幹肌肉強。端居不娶婦，何以爲肺腸。曰：予有父母，飽食乃其常。竭蹶事播種，猶畏無餘糧。女子絕膂力，豈能勤畝疆。坐歿則固然，粟虧豈有糧。况兼盜賊滿，竊發難豫防。盡室速走避，中夜踰崇岡。羸老仗擔負，一心無異商。胡能挾婉變，與之共悲惶。

清

張十一郎官詞

有序見壇廟靜安綏佑公廟下不重錄

毛奇齡

撞天關振雷鼓男旁招女拂舞冬贈堂春弭拊來無方去無所雲爲船烟爲馬

間一白烟

霏霏兮碧水洋洋鴟龜曳銜兮以堤以防芻龍初駕兮茅旗畢張西行弱水兮東通扶桑彭咸何在兮冰夷久藏啣木不可以填海兮鞭石不可以爲梁逝將灑浪兮遠放之無何之鄉斯世既不可與居兮聊逍遙以相羊

間二

鹵兮斥望衍圻隄石爲留兮海不溢

三山之曲有神宅神燈歸來兮夜雨如漆

間四

剝羊剝豕薦腥羶兮芟毛薙土築堂壇兮

袂除釁臭具湯盤兮金樞玉笥藏衣冠兮四招以茅願神之還兮藎館包肉無敢先嘗兮春秋饗祀長居此故鄉兮海水可竭神不可以忘兮

間五

北嶺將軍廟詞

有序互見壇廟武佑廟下

前人

蕭之北幹山舊多種松深林如神居山頭有嶺名北嶺祠厲將軍神於嶺間或曰神以驅厲名或曰此秦人厲狄也隨項羽入關歸葬此山稱將軍以祠在北嶺稱北嶺將軍相傳山前刨地得石穴骸物俱壞惟顱骨尙存大如車籬卽將軍墳云宋徽宗朝睦州方臘反將寇杭州艤舟於蕭山西江之濱吏民恐禱將

軍神忽東北風發壞其舟夜半見甲士列岸傍中有巨人介首衣虎豹皮長出

衆數尺驚不敢近知越州

毛集作知縣今考府志更正

劉韜上其事封武佑將軍暨元至正

間東南寇起西陵烽火徹晝夜有從賊中來者云賊思分遣寇東浙以江岸有兵故止然實無一兵也漁船涉江者深夜見神燈滿江岸如列營然以故賊終不敢渡時青田劉基奉其母避兵蕭山值縣修將軍祠基爲文紀事勒石祠左北幹村人每歲於正月初四日祠將軍至今不絕元陶九成載元時至正某年大旱禱於廟得雨俄有降乩於廟者云將軍自言吾有德於民民不忍忘我俾血食於此幾千五百年矣蓋祠久能神呂覽曰五世之廟可以觀怪神至則近於怪焉

翳北山之翠光兮種落落之高松合千章以爲屋兮連五釵而成叢上拂飛雲之窈窕

兮下蟠曲藟之青葱遠觀紅廟在樹中兮近乃識乎將軍

間一松門

兮如椽登玉趺兮挂

朱樓黃驪爲旂兮白狼爲旃頸披鉏鍬兮臂介以鈎紫茸飾鐙兮琉璃鞭勒盧之刺兮

鑒金之罇

間

西行兮秦關羊腸萬里兮環如曲盤將軍一去兮復來還江東父老兮猶

知令顏千秋扞我兮戴將軍之恩

間

松風兮颼颼將軍之出兮駕靈虬松風兮颼颼將

軍之入兮靈旗蔽之不見將軍兮使我思

間

松花兮如蕢新開社酒兮醉將軍社樹兮

松楸社羔三獻兮松陰未斜請拂將軍之帽兮簪以花

間

連年累歲兮禾未登楊枝三

起兮蠶眠不成烏鴟攫肉兮鼠覆罌雞雛失伏兮牛羊又胄生年何幾兮遭時甲兵官

吏到門兮驚又驚

間

但願兮今茲倉庚鳴兮桑葉肥耕牛叱叱兮長負犁空村啞札兮

唯聞繰絲桔槔挂左壁兮清泉滿畦高楊歇日兮涼蟬嘶秋霜未降兮先授以衣新收

禾黍兮足供神之饔王孫遊兮皆來歸

間

饑婦行

有序

丁克振

歲辛己鬻子女以數文量僵尸以幾里目有所擊咽而成聲嗟乎哉小民於骨

肉情誼之間則已如此矣

鵝眼千買婦妍入亦鞭之出亦鞭之張目如曙呼婦出門去東有女士柔妙無比願假

燕言以易數七顏頰澁口忍不顧恥終不得食蜿蜒而死汝朝離此暮則飽犬豕張目如曙呼婦出門去

浦陽江南五十里仙人岳與百藥山相對峙毛甞登陟之慨然成詠 毛奇齡

十三始登山見山如見鬼十五見山久踏之似牛豕仙人之岳對百藥驟見猶然起驚愕魑頭頰足何處來頓使岳前倒行脚當年策彊執神鞭欲驅此岳神山前彊項不得卒到海仙人就居近有年四圍削琢作門闥轟騰煇燭鑪竈闊攢空岬嶸起萬燄燒出丹砂紫花片在旁有石類駕鼇前當巨石鼇將逃修鱗入溪淹鼇足昂首絲絲細噴玉我傳此鼇腹虛空仙人產兒坐當中八月水枯穴溪底硃旗石竿羅青葱枯查倒海插石罅千年海生石山下祇恐此鼇負岳去黑風驟雨駭秋夜楓橋山人老蓮子曾畫富春江山水一日畫得一幅成當此一月不得似我今勉強攀天關仙人作歌留樹間向前倚樹和歌去西呼茅狗聲斑斑

湘湖采蓴歌三首

單隆周

西城春暮桃李香春風吹落春溪傍人隨花片緣溪入小橋南去皆橫塘橫塘一望天水碧四山蒼翠真欲滴層層屏幃繞湖波青峯盡處湖烟白水面新葵葉似錢隨波長短芳且鮮卵色天中雉尾密玻璃影裏晶珠懸下有丁首丙尾之素鯽上有晨開夕合之水仙小舟擊汰衝波綠翠荇縈衣垂露薄仙靈釵股合還分解珮生絲遞相續日暮村莊似有無前灘月色開菰蒲棹聲一歇萬籟靜蒼茫彷彿千里湖采蓴采蓴風蕭蕭濃陰滿樹啼伯勞羊酪久輸陸內史鱸魚正惱張東曹聽闌拾菜曲未譜採菱歌東南風味稱殊絕實與含桃同催科野蔌澗毛苦易盡銀盤玉筍將如何

誰家蕩槳湘湖曲垂楊兩岸紛相逐朦朧白露花如烟蓴絲細細搖空綠顆顆鮫珠水底明採來還似玉壺冰冷淘槐葉香非冽滑膩醞醑味乍凝外湖沙淺根株少鷗鳬唼喋漁罟繞裏湖澄敞多盤渦卷葉抽莖似芳草爲語採蓴須及早遲迴莫待秋風老五侯之鯖高如山馬行酒炙車斑斑窮搜珍錯幸一顧犀箸不下空間關蓴根瑣細生湘渚綠跗柔枝密如縷肉食焉知神格超抱甘獨向波瀾苦幽人氣味條相投筐筥朝

來理釣舟擷實何辭隄路永
攀芳不惜水痕收
寒香一帶平橋口
脆質腴條不留手
汲取清泉菜竹燃
披襟坐吸除煩垢
寄語同心共往還
冰甌雪椀非人間

江塘行

陳至言

吁嗟乎江塘行東南巨海連蓬瀛
蕩天沃日搖蒼溟
百川萬派歸錢塘
江潮吐納隨虛盈
銀峯萬仞截江出
雪屋千重捍江立
西陵渡口蛟龍犇
越王城外江聲急
江聲夜發驚雷霆
斷岸橫塘五千尺
千尺橫塘長復長
大門小門如巍隍
怒濤蹴沫盡消滅
海童不敢爭飛揚
可惜去年四五月
野鬼穿塘水盡決
今年春漲水復來
兩度紅潮誰可遏
馮夷擊鼓神虬吼
排山裂石崩沙走
錢王鐵弩射不開
白雪青山兩環鬪
倏忽城郭行江河
茅簷釜甑遊黿鼉
黑波滄溟數百里
高原峻谷流盤渦
可憐閨中婦吞聲
苦復苦眼前兒女同
忍饑忽聞水聲不敢啼
更有白髮人仰天
流淚俱沾巾
舊年種粟無官糧
今年耕田徒苦辛
吁嗟乎江塘行一曲
一聲難爲情

五言古

元

江聲草堂

薩都刺 蒙古

卜居西陵下門臨大江
臯江聲自朝夕豈獨喧
波濤海潮作波浪山岳俱動搖
海潮有時息逝水去無極
驚風吹浪花噴濺射崖壁
萬籟俱澄心何必絲竹音
月明歌水調驚起蛟龍吟

蜀山草堂

前 人 一作薩天錫

蜀山秀東國華山分蛾眉
人傳西極來萬里如龍飛
根盤大江曲終古不復移
之子結茅屋開軒當翠微
流水穿澗道白雲繞巖扉
松葉釀我酒吉貝爲我衣
山鳥或勸飲水客同吟詩
造化縱前定榮名不可期
終焉忘嘉遯採藥復採芝

乾隆志古蹟按語蜀山草堂在山陰之蜀山考蕭山亦有東蜀山西蜀山之名故存之

旦發漁浦夕宿大浪灘上

柳 貫 浦江

張帆得順風飛鴻與爭疾後浪蹙亦舒前山過如失桐江轉數灣上瀨未入日篙工享
安便坐穩頭屢櫛人生倚造物理微難究詰處順安可常離憂詎能必白鷗知此情故
向波間沒

明

石巖山

劉基
寓賢

落日下前峯輕烟生遠林雲霞媚餘姿松柏淡清陰振策縱幽步披襟陟層岑
檜花籬上明莎雞草間吟涼風自西來颯颯吹我襟榮華能幾時搖落方自今
逝川無停波急絃有哀音顧瞻望四方悵焉愁思深

宿西興

高啓
寓賢

挂帆無天風到岸日已夕捨舟理輕裝欲問古鎮驛淅淅灘聲迴莽莽山色積
僕夫夜畏虎告我弗遠適望林投人家炊黍旋敲石寒眠多虛驚我體若畏席
誰云別家遙數日已在客今宵始驚歎東西大江隔

題顧節婦

蘇伯衡寓賢

落葉不返枝水逝無還時妾心一寸鐵百煉剛不移
篝燈夜紡績將書教兒習了此未亡身終期死同穴

題隱耕圖

洪鏞

吾邑西山下君家住更西百年忘寵辱終歲樂幽棲
沃壤資三熟生涯在一犁呼兒勤伺犢戒僕早聽雞
高棟縣龍骨衡門絕馬蹄來牟連屋近桑柘覆簷低
花外提壺語林間布穀啼沾濡天雨澤灌溉水分溪
託蹟堪鄰鄭窮經合並倪不辭身滴汗寧憚足塗
泥曉摘蔬盈圃秋收稻滿畦甌香炊白飯甕澹釀黃
螯禮讓誇淳朴經營笑滑稽相親多野老主饋有山
妻靜裏詩還覓閒邊杖復攜優游太平世何必慕金
閨

閱龕山戰地遂登岡背觀潮

徐渭山陰

白日午未傾野火燒青昊蠅母識殘腥寒蛩聚秋草
海門不可測練氣白於擣望之遠若遲忽焉過如掃
陰雨噫大塊冷豔攔長島怪沫一何繁水與水相澡
玩弄狎鬼神去

來準昏曉何地無恢奇焉能盡搜討

題苧蘿西子祠 二首

來集之

泉石流素香昔年浣紗處功名解誤人西子入吳去彊笑非所歡歌舞何薄遽還顧舊時伴布帛相晤語妾心有隱憂寧不如衆女

芳名滿天下遇合俟良時西子生苧蘿松風吹門屨一朝吳騎雄坐困諸男兒君王無長策堆金選娥眉專寵冠吳宮古今稱絕姿譬諸美珠玉非物所得私寄言柴門子無復歎貧爲

重葺湯太守祠有感兼贈李使君

毛奇齡

先哲有遺澤所重在廟祀况能利是不止悅從事緬想前代賢大者闡理義細亦克樹績樽俎列爲例夫君親裸薦每祀致精意稽神戀脣蕭假廟葺頽廢伊昔漢太守不以一錢繫近且開湯門恩共海濤漭感激拜祠宇前後治無二以之祝金石取壽在世世

清

題耕隱卷子

有序

前人

邑前進單能重先生名瑞隱居西山下自明洪熙至成化杜門絕仕進別號耕隱同志並爲詩贈之迨今幾三百年矣康熙戊辰其裔孫廣宗爲修其遺卷示予予捧而誦之有二洪先生一名鐘一名鏞皆洪宣間詩人其詩類元和長慶名家而其字不傳並不識住何所其子姓于今誰似惜前人輯詩家不能旁搜而邑有前進如是不能一表微爲可憾也因取仲洪先生名鏞者長律一首依其韻和之雖慚續尾顧私喜一日附兩賢後乃應廣宗請而復爲識其大略如此

舊氏傳江表前賢住郭西此山曾豹隱深巷有烏棲地僻難迴轍春陰自洗犁隨時觀塞馬翫世等醯雞但辨麻和菽能忘筌與蹄壇邊松障合門外柳枝低乳犢唧唧出新鶯繞樹啼商歌留白石叢話記青溪奕代存風節居家鮮傲睨川迴魚汕藻堂改燕巢

泥筆篋餘花譜衣形想稻畦閒看三徑菊貧授一莖蠶族茂開於越高風著會稽詩題
王霸友隱並老萊妻故老行堪式賢孫卷自攜遺文追往哲流譽滿中閨

題丁履端身後芳名卷

有序

單隆周

履端明太學生父病篤具疏請代父良愈而履端死閱月於廢篋中得其藁同
邑孫學思書身後芳名

庾子求代死月杪延樞星張孫求代闇金鑰轉雙睛夸杖成鄧藪衛石填滄溟事勢豈
不艱洞達惟精誠猗嗟東阜君令德垂典型三讓膠庠爵六堂洙泗經悲此膏下童勞
我帖上情遂因人定餘灑血干帝庭寒風吹瓣香短燭搖雲屏哀毀有兩斃易僵猶隻
生祝宗無他祈飲食詛身傾喬枝高參天鶴鳴鮮和聲爲誦蓼莪詩千載同拊膺

張節婦詩

八首有序

前人

里中張氏子素無賴使酒縱博己酉秋遂鬻其婦發有日矣其婦啼泣不食縊
而死

翠柏縈蔓草雛鸞投燕巢猗彼窈窕姿二姓成久要虹梁日初升春園桃正夭登堂奉棗栗容止以不佻

貧家婦難爲女紅日易短潘醕突始黔紉紆衣未煖終風噎重陰憂心如匪澣雖有歐冶鋒割水何時斷

良人遊狹斜作計一何拙酒漿與博徒步步尋毛薛盧雉有雙呼餅壘無單竭來歸相怨怒輿傷輻輪折

拔我頭上釵君囊恆苦微解我嫁時裳君腹恆苦饑君腹尙苦饑妾飽寧有時但祝天雨粟與君共鋪糜

平昔相怨怒將離乃懽笑言談久赳赳瞻眎倍顛倒云有里中兒多錢聘年少及茲綽約辰高遷事重醺

嗟哉生不辰自反誠何辜抱布可買絲東菑豈以齊眉人驅豚入屠酤君心有棄婦妾意無金夫